

# Gabinete Fronteiras Marítimas

11-12  
2015

BOLETIN  
NOTÍSIAS  
NOVEMBRU  
DEZEMBRU

Gabinete Fronteiras Marítimas  
Konsellu ba Delimitasaun Definitiva ba Fronteiras Marítimas  
Dili, Timor-Leste  
+670 7742 5544  
info@gfm.tl



## REUNIAUN KOMISAUN KONSULTIVA

Iha 19 Outubru 2015, hafoin Assembleia Jeral ONU nian iha Nova Iorque, Komisaun Konsultiva halao tan reuniaun ida iha Dili, ida ne'ebé Primeiru Ministru Dr Rui Maria de Araújo mak lidera, ho partisipasaun ativu husi membru Komisaun sira.

Reuniaun ne'e hahú ho apresentasaun ida husi Ministériu Negósius Estranjeirus no Kooperasaun no taka ho apresentasaun ida husi TIMOR GAP.

## KONSULTASAUN MARÍTIMA BA DARUAK HO INDONESIA

Husi 29 to'o 30 Outubru 2015, konsultasaun ba daruak entre Repúblika Demokrátika Timor-Leste no Repúblika Demokrátika Indonézia halao iha Surabaya, Indonézia.

Nasaun rua ne'e koalia no konkorda ho prinsípius no liñas orientadores ba negosiasaun hirak ne'ebé sei tuir mai. Nasaun rua ne'e mos koalia no konkorda ho planu-servisu-hamutuk ne'ebé haré liu-liu ba faze negosiasaun ba delimitasaun fronteira marítima.

Hanesan konkorda ona iha reuniaun ba konsultasaun dahuluk, nasaun rua ne'e sei servisu ho espíritu amizade no kooperasaun mútua. Nasaun rua mos afirma katak negosiasaun ba fronteira tenki tuir lei internasional, liu-liu tuir Konvensaun Nasoens Unidas Lei Tasi nian [UNCLOS].

Timor-Leste representa husi delegasaun sira husi Ministériu Negósius Estranjeirus no Kooperasaun, Gabinete Fronteiras Marítimas no husi Gabinete Prezidente nian. Negosiasaun ba fronteira marítima nivel tékniku sei hahu iha trimestre dahuluk iha 2016.



Timor-Leste nia delegasaun (sorin karuk) no Indonézia nia delegasaun (sorin loos)



*Em a 200 resin mak atende eventu ida nee.*



*Diretora Exekutiva Elizabeth Exposto enkoraja atu participante sira fahe informasaun kona ba Fronteiras Marítimas ba sira nia belun no familia sira.*

## APREZENTASAUN BA VETERANUS SIRA IHA BAUKAU

Iha 19 Novembru 2015, Gabinete Fronteiras Marítimas hetan konvite ida hodi halo apresentasaun ida ba veteranus sira iha Suku Badomori, Venilale, Baukau.

Objetivu husi apresentasaun ida ne'e mak atu aumenta ema nia koñesimentu kona ba Timor-Leste nia esforsu hodi delimita fronteiras marítimas ho nia vizíñu rua; Austrália ho Indonezia.

Sra Inês Almeida, Primeiru-Ministru nia Oficial Ligasaun ba Asuntu Veteranus nian, bolu atensaun ba participante sira atu hametin unidade no suporta Governu iha kestaun ida ne'e. Sr Rolex, Sekretáriu Jeral ba Veteranus sira enkoraja Gabinete Fronteiras Marítimas atu halo apresentasaun ne'e regularmente iha Timor-Leste laran tomak.

Participante foin sae ida, Domingos Correia, refere ba Ministru Gusmão nia diskursu iha Institutu Internasional ba Dame iha Nova lorque katak "maske ami nia tasi só iha deit kadiuk ka boek, ne'e ami nian. Ami sei luta ba sira."

Gabinete Fronteiras Marítimas mos fahe informasaun material sira iha Tetun ba participante sira kona ba Timor-Leste nia reivindikasaun ba fronteiras marítimas.

## APREZENTASAUN IHA ARKIVU & MUZEU REZISTÊNSIA

Iha 2 Dezembru 2015, ho senáriu istóriku Arkivu & Muzeu Rezistênsia nian, Gabinete Fronteiras Marítimas fó apresentasaun ba grupu boot estudante sira husi Universidade Curtin, Austrália Osidental ne'ebé vizita hela Timor. Membre sira husi comunidade Veteranus no representante husi Primeiru-Ministru nia Gabinete mos atende apresentasaun ne'e.

Sra Elizabeth Exposto, Diretora Exekutiva husi Gabinete Fronteiras Marítimas koalía barak kona ba istória disputa Tasi Timor nian. Nia mos koalía kona ba progresu konsultasaun ho Indonézia no tentativa sira atu koalía ho Austrália. Bainhira Gabinete Fronteiras Marítimas esplika istória Tasi Timor nian ho termu simples, no tanba sa mak Timor-Leste buka fronteiras marítimas tuir lei internasional, estudante sira laran monu ba kestaun ne'e no hakarak hatene liu tan.



*Gabinete Fronteiras Marítimas ho participante sira iha Arkivu & Muzeu Rezistênsia iha 2 Dezembru 2015*

## KONFERÊNSIA INTERNASIONAL IHA LONDRES

Husi 30 Novembru to'o 2 Dezembru 2015, Gabinete Fronteiras Marítimas, hamutuk ho Ministériu Negósius Estranjeirus no Kooperasaun, partisipa iha Konferênsia Fronteira Internasional iha Londres ho nia tema "Explora Aproximasaun ne'ebé Integradu ba Fronteira Internasional no Kestaun Teritória".

Konferênsia ne'e eventu ida ne'ebé la'os hodi buka lukru. Volterra Fietta, King's College of London (Departamentu Jeografia), Marbdy Consulting Ltd no Maritime Zone Solutions Ltd mak organiza.

Orador sira mak espesialista mundu nian no pratikante sira iha rezolusaun efetivu ba teritória ne'ebé iha disputa. Participante sira mai husi mundu tomak no husi profesaun oiain, inklui lei, akademia no diplomasia.

*(K-L) Felismina dos Reis, Gabinete Fronteiras Marítimas, Lisualdo Gaspar, Ministériu Negósius Estranjeirus no Kooperasaun ho Dr Robin Cleverly husi Marbdy Consulting Limited iha Royal Geographical Society, Londres iha 2 Dezembru 2015*



## APREZENTASAUN BA VETERANUS SIRA IHA AILEU

Iha 29 Dezembru 2015, Gabinete Fronteiras Marítimas hetan konvite tan hodi halo apresentasaun ba veteranus sira, desta vez iha Aramerí, Suku Liurai, Aileu kona ba progresu ba negosiasaun ba fronteiras marítimas ho Austrália no Indonézia.

Ida ne'e hanesan oportunidade ba Gabinete Fronteiras Marítimas hodi esplika istória kona ba akordu hirak ne'ebé halo ona kona ba Tasi Timor ho Austrália husi 1972 to'o 2006.

Sra Inês Almeida, Primeiru-Ministru nia Oficial Ligasaun ba Asuntu Veteranus nian, refere ba Ministru Xanana Gusmão nia komentáriu husi diskusaun ba orsamentu Estadu nian katak ita tenki hamutuk hodi luta ba ita nia soberania kompleta, no delimita ita nia fronteiras marítimas ho Austrália no Indonézia sei kompleta ita nia soberania hanesan nasaun ida.



*Austrália ho Indonézia mak kria Timor Gap. (K-L) Felismina dos Reis, Suzana Gusmão no Sra Inês Almeida*